

յարված թեման, հանձնաժողովին ներկայացրեց համապատասխան գեկուցագրեր: Ներկայացված գեկուցագրերի հիման վրա համաժողովը պատրաստեց մի պատգամ ուղղված Եվրոպայի բոլոր Եկեղեցիներին և քրիստոնյաներին: Պատգամում մասնավորապես նշված է. «Համաժողովում կարդացված գեկուցումներն ու մտքերի փոխանակությունները հարստացրին մեր հավատը Սուրբ Հոգու անձի և գործի նկատմամբ, մի անգամ ևս մենք զգացինք, որ նա ամեն օր գործում է մեր Եկեղեցում և

այլազան ձևերով մեզ առաջնորդում միության ճանապարհի վրա»:

Համաժողովի վերջում շուրջ 200 պատվիրակներ մասնակցեցին Կոնֆերանսի նախագահության և գործադիր կոմիտեի նոր անդամների ընտրությանը: Նախագահության նախագահ ընտրվեց Միրայի միտրոպոլիտ Խրիզոստոմը, որը համաժողովում ներկայացնում էր Կ. Պոլսի Տիեզերական Պատրիարքությունը, որի իրավասության ներքև է գտնվում Կրետեի Եկեղեցին:

ԱՐԵՎԵԼՅԱՆ ԵՎՐՈՊԱՅԻ ՍՈՑԻԱԼԻՍՏԱԿԱՆ ԵՐԿՐՆԵՐԻ ԵԿԵՂԵՑԻՆԵՐԻ ՆԵՐԿԱՅԱՑՈՒՑԻՉՆԵՐԻ ԵՐԿՐՈՐԴ ՀԱՆԴԻՊՈՒՄԸ ԵԿԵՂԵՑԻՆԵՐԻ ՀԱՄԱԾԽԱՐՀԱՅԻՆ ԽՈՐՀՐԴԻ ՂԵԿԱՎԱՐՈՒԹՅԱՆ ՀԵՏ

Սույն թվականի հունվարի 28—31-ը Հունգարիայի Ժողովրդական Հանրապետության մայրաքաղաք Բուդապեշտում տեղի ունեցավ Եկեղեցիների համաշխարհային խորհրդի (ԵՀԽ) ղեկավարների հանդիպումը Արևելյան Եվրոպայի սոցիալիստական երկրների ԵՀԽ-ի անդամ Եկեղեցիների ներկայացուցիչների հետ: Նման մի հանդիպում առաջին անգամ տեղի էր ունեցել 1977 թվականի մարտին, դարձյալ Բուդապեշտում:

Սույն հանդիպման նպատակն էր՝ էլ ավելի աշխուժացնել ու ջերմացնել Էկումենիկ կյանքը, ամրապնդել և սերտացնել հարաբերությունները բոլոր Եկեղեցիների միջև՝ Քրիստոսի սիրո մեջ առավել օգտակար լինելու համար միմյանց և միասնաբար ծառայելու աշխարհի բոլոր մարդկանց, որոնք որդիներն են միևնույն Աստուծո:

Ժողովը գումարվեց Հունգարիայի ռեֆորմիստական Եկեղեցու կողքի մեծ սրահում:

Հանուն Հայաստանյայց Առաքելական Եկեղեցու սույն խորհրդակցությանը մասնակցեց Թիրակի թեմի առաջնորդ տ. Նարեկ եպիսկոպոս Ծաքարյանը:

Հունվարի 28-ին, երկուշաբթի օրը, աղոթքով և ողջույնի ու բարիգալստյան խոսքով ժողովը բաց արեց Հունգարիայի Եկեղեցիների Էկումենիկ խորհրդի նախագահ ղոկոտ. Տիբոր Բարթա եպիսկոպոսը:

Ապա ընդարձակ գեկուցումով հանդես եկավ ԵՀԽ-ի գլխավոր քարտուղար ղոկոտ. Ֆիլիպ Փոթըրը: Գլխավոր քարտուղարի գեկուցման մեջ առաջ քաշված հարցերի շուրջ, հաջորդական հինգ նիստերի ընթաց-

քում, տեղի ունեցան ելույթներ և մտքերի լայն փոխանակություն: Եղբայրական համերաշխ մթնոլորտում առաջադրված բոլոր հարցերն ամփոփվեցին համապատասխան որոշումներում:

Խորհրդակցության մասնակիցները միահամուռ այն կարծիքը հայտնեցին, որ ԵՀԽ-ն բոլոր Եկեղեցիների վստահությունը վայելող համաշխարհային մեծ կազմակերպություն է, հետևաբար նրա հաջողությունները պետք է նկատել յուրաքանչյուր անդամ Եկեղեցու հաջողությունը: Իսկ բոլոր Եկեղեցիները օղակողը ինքը՝ մեր Տեր և Փրկիչ Հիսուս Քրիստոսն է: Նրա հավատով և սիրով ոգեշնչված՝ բոլոր եկեղեցիները պարտավոր են շարունակել իրենց աստվածահաճ ծառայությունը հանուն առաջադիմության և մարդասիրության:

Խորհրդակցությունում սոցիալիստական երկրների Եկեղեցիների ներկայացուցիչներին մասնավորապես մտահոգում և զբաղեցնում էին ներկա աշխարհը և համայն մարդկությունը հուզող այնպիսի հարցեր, ինչպիսիք են աշխարհի խաղաղության չափազանց, ցեղային խտրականության վերացման, մարդու իրավունքների, կրոնի ազատության, տնտեսական և հոգևոր-քաղաքական ռեսուրսների օգտագործման ու բաշխման վերաբերյալ հարցերը:

Ժողովի մասնակիցները նշեցին, որ այսօր չի կարելի լինել քրիստոնյա և չպաշարել այնպիսի մեղքի դեմ, ինչպիսին է, օրինակ, օեղասպանությունը, որը պետք է արմատախիլ անել մարդկության միջից, որպեսզի լուսնը չունենան նրանից ծնվող մութ մեղքերը՝ լինի դա ցեղասպանություն կամ ապարտեիդ:

Ժողովը առանձնակի կարևորությամբ զբաղվեց խաղաղության պահպանման հարցով, որպես առաջնահերթ հրամայական՝ ընդգծելով, որ ով խաղաղության հետ չէ՝ նաև Քրիստոսի հետ չէ և չունի Էկումենիկ ճշմարիտ ոգի:

Վերոհիշյալ Եկեղեցիների ներկայացուցիչների բոլոր մտահոգությունները հավասարապես բաժանում էին խորհրդակցությանը մասնակցող ԵՀԽ-ի ղեկավարները, որոնք իրենց պատրաստակամությունը ցուցաբերեցին առաջադրված բոլոր հարցերում օգնելու նրանց և գործելու նրանց հետ միասին:

Խորհրդակցությունն զբաղվեց նաև 1983 թվականին գումարվելիք ԵՀԽ-ի 6-րդ համաժողովին վերաբերող գործնական մի շարք հարցերով:

Հունվարի 31-ին, ուրբաթ օրը, երեկոյան, Հունգարիայի Եկեղեցիների Էկումենիկ խորհուրդը, ի պատիվ խորհրդակցության մասնակիցների, կազմակերպեց պաշտոնական ընդունելություն, որին ներկա էր նաև Հունգարիայի Ժողովրդական Հանրապետության պետական քարտուղար և կրոնական գործերի խորհրդի նախագահ Իմրե Միտեշը:

